

ლადო პაპავა თემურ ბასილიაზე ქებნის შეწყვეტას ითხოვს

გაზეთი “ახალი თაობა” – 21 იანვარი, № 16, 2013

პროფესორი ლადო პაპავა ფიქრობს, რომ „ქართულმა ოცნებამ“, სამწუხაროდ, შეცდომა დაუშვა, როცა დასავლეთის ლობისტურ კომპანიებთან ხელშეკრულებები გააუქმა. ამასთან, პროფესორი სწორ და ეკონომიკურად მართებულს უწოდებს მთავრობის მხრიდან პრეზიდენტის ფონდის თანხების შემცირებას.

რა კოზირი უჭირავს ხელში ივანიშვილის მთავრობას და რას ვერ იყენებს სათანადოდ ამერიკის მხრიდან გაკეთებული განცხადებების საწინააღმდეგოდ, ამ საკითხების ირგვლივ გთავაზობთ ინტერვიუს ეკონომიკურ მეცნიერებათა დოქტორ, პროფესორ ლადო პაპავასთან.

– ბატონო ლადო, პრეზიდენტი სააკაშვილი გუშინ სამი საკანონმდებლო ინიციატივით გამოვიდა, რომელთაგან ერთი შეეხებოდა ეკონომიკურ ამნისტიას. სააკაშვილი ამტკიცებს, რომ ქვეყანაში ეკონომიკური სტაგნაცია და კრიზისია. ეს ობიექტური რეალობაა?

– პრეზიდენტის სურვილია, რომ ბიძინა ივანიშვილი და მისი მთავრობა წარუმატებელი იყოს, ამიტომ იძახის იმას, რაც სურს და არა იმას, რასაც სინამდვილეში აქვს ადგილი. ოფიციალური სტატისტიკა ადასტურებს ეკონომიკურ ზრდას, ამიტომ ნამდვილად არ ვიცი რას ემყარება სააკაშვილის განცხადება ეკონომიკური კრიზისის შესახებ. რაც შეეხება ეკონომიკურ ამნისტიას, მე მისი წინააღმდეგი ყოველთვის ვიყავი. ასეთი რამ ბიუჯეტს ზიანს აყენებს, რადგანაც გადასახადის გადამხდელის ქცევაში ყალიბდება სტერეოტიპი, რომ მომავალშიც შეიძლება ამნისტია გამოცხადდეს და ამიტომ ურჩევნია დააგროვოს საგადასახადო დავალიანებები, მომავალი ჩამოწერის იმედით.

– პრეზიდენტი ახალ ხელისუფლებას სთავაზობს აგრეთვე კანონით აიკრძალოს პირად ცხოვრებაში ჩარევა და ამის დამადასტურებელი ინფორმაციის გავრცელება. ამით სააკაშვილს წინა ხელისუფლების დანაშაულების გადაფარვა სურს, თუ მართლაც დემოკრატიულ ფასეულობებს იცავს?

– ნეტა რატომ არ მიიღო ეს გადაწყვეტილება მაშინ, როცა მთავრობა და საპარლამენტო უმრავლესობა მისი იყო? აშკარაა, რომ სააკაშვილის სურვილია დამალოს მისი გუნდის მიერ ჩადენილი ბოროტებანი.

– მოდით, ეკონომიკურ საკითხებს დავუბრუნდეთ. პენსიები, რომლის ზრდასაც ამომრჩეველი ელოდა. საზოგადოებაში ამბობენ, რომ 150 ლარი დანაპირებზე ნაკლებია.

– პენსიები 1 სექტემბრიდან უნდა გავიდეს დღეს მოქმედ ოფიციალურ საარსებო მინიმუმზე და ეს არის 150 ლარი. რა თქმა უნდა, 150 ლარი აშკარად დაბალია. სავარაუდოდ, საარსებო მინიმუმი მეტია. მაგრამ იმ ვადებში, რა ვადებშიც ხდებოდა ბიუჯეტის პროექტის მომზადება, განხილვა და დამტკიცება, მთავრობა პრონციპულად ვერ მოასწრებდა ახალი საარსებო მინიმუმის გათვლას. 2013 წელს უნდა მოხდეს საარსებო მინიმუმის გადათვლა. იმისათვის კი მისი გათვლის მეთოდოლოგია შესაცვლელი. აშკარაა, რომ კალათის კალორიულობა გასაზრდელი. მე დარწმუნებული ვარ, რომ ეს კალათა გაიზრდება და უკვე 2014 წლის ბიუჯეტის პროექტის შედგენისას, გათვალისწინებული უნდა იქნეს, რომ პენსიები უნდა გავიდეს ახალი საარსებო მინიმუმის კალათის დონეზე. ვფიქრობ, სავსებით სწორად ჩაიფიქრა ფინანსთა მინისტრმა, რომ პენსიები გაიზარდოს 1 სექტემბრიდან. შემოდგომა ტრადიციულად არის პერიოდი, როდესაც სასოფლო-სამეურნეო ბაზარზე იზრდება მიწოდება. ხოლო მიწოდების ზრდის კვალობაზე გარზრდილი პენსიები აღარ გამოიწვევს ინფლაციურ ზეწოლას ეკონომიკაზე. ამიტომ ეს, აბსოლუტურად სწორი გადაწყვეტილებაა.

– რამდენად სწორად გათავალა ხელისუფლებამ, როდესაც გარკვეული ფინანსები ჩამოაჭრა პრეზიდენტის ფონდს, მერიას. მხოლოდ საპიარო განცხადება იყო სააკაშვილის მხრიდან ამის საპასუხოდ, არა უშავს, დედაჩემის მანქანაზე გადავჯდებიო.

– ხომ ხედავთ, რომ არ გადამჯდარა. ჩვენ ხომ ვიცით, რომ პრეზიდენტის ამას არ გააკეთებს. პრინციპში, აქ ამაზე არ არის საუბარი. პრეზიდენტის გარკვეული ხარჯები იყო თავდაცვის სამინისტროზე მიწერილი: თვითმფრინავები, ვერტმფრენები. არ არის საქართველო იმდენად მდიდარი ქვეყანა, რომ ქვეყნის პრეზიდენტს შეეძლოს ასეთ ფუფუნებაში ყოფნა. აქედან გამომდინარე, როდესაც მთავრობამ მიიღო ეს გადაწყვეტილება, რომ პრეზიდენტის გაუმართლებელი ხარჯები შეეკვეცა, არის სწორე. რაც შეეხება უშიშროების საბჭოს პრემიერ-მინისტრი იბახის, რომ ფინანსთა მინისტრმა და მთავრობამ მოსთხოვა უშიშროების

საბჭოს ინფორმაცია, თუ რაში სჭირდება ეს ათეულობით მილიონი. სამწუხაროდ, უშიშროების საბჭო არ იძლევა არანაირ პასუხს. შეიძლება თქვენ არ იცოდეთ, როგორც ჟურნალისტმა და მე არ ვიცოდე, როგორც ექსპერტმა, მაგრამ მთავრობამ ხომ უნდა იცოდეს რაში იხარჯება ამდენი ფული?! და თუ უშიშროების საბჭო ამის ახსნას არ იძლევა, აქედან დასკვნა, მაშინ ეს ფული უაზროდ იყრება, მაშასადამე, არ ყოფილა საჭირო. ასე რომ, ესეც აბსოლუტურად სწორი გადაწყვეტილებაა. გაუაზრებელი მშენებლობები, გაუაზრებელი გადაყრილი ფული, ეს ყველაფერი დიდი თანხაა. შკარაა, რკმ ჩვენ ძალიან ბევრი ფული გვაქვს გადაყრილი ქუთაისში პარლამენტის მშენებლობაზე, გაუაზრებელი ძეგლების და შადრევნების მშენებლობაზე. ბუნებრივია, მსგავსი პროექტები უნდა შეჩერდეს.

– ბატონო ლადო, ევროსაბჭოში შეხვედრების დროს იუსტიციის მინისტრმა თვა წულუკიანმა აიღო ვალდებულება, რომ სტრასბურგის სასამართლოს გადაწყვეტილებას გირგვლიანის საქმეზე, აუცილებლად ადასრულებს. გადაწყვეტილებაში მითითებულია, რომ პრეზიდენტმა ყველაფერი გააკეთა, რომ დანაშაულში მხილებული მაღალჩინოსნები დაეფარა. ამით ფაქტობრივად მიხეილ სააკაშვილის დანაშაული გამოიკვეთა ევროსასამართლოს მხრიდან. ამ ფონზე სააკაშვილის ბოლო ნაბიჯებს როგორ აფასებს?

– სწორედ ამიტომ საახალწლო მიმართვაში პრეზიდენტი წარსდგა ე.წ. 5-პუნქტიანი გეგმით. მაგას უყვარს 10-პუნქტიანი გეგმა, 5-პუნქტიანი გეგმა... სასაცილო გახდა უკვე. ამ 5-პუნქტიანი გეგმიდან ყველაზე ასასცილოა პირველი ორი პუნქტი: პირველი პუნქტი ეხება იმას, რომ მოდი შევწყვიტოთ ერთმანეთის ლანძღვა, ხოლო მეორე პუნქტის თანახმად ნუ დაიჭერთ ჩემი გუნდის დამნაშავე წევრებს და მეც დამანებეთ თავიო. მაგრამ, მე ისეთი ლანძღვა, როგორც თვითონ სააკაშვილსგან მოდის, არავისგან არ გამიგია.

– ეს შეთავაზება პრეზიდენტის მხრიდან გარკვეულწილად უკან დახევაა ახალ ხელისუფლებასთან? ის გრძნობს, რომ მისი პასუხისმგებლობა თანდათან იკვეთება?

– თვითონ პრეზიდენტი ილანძღება და იფურთხება: ის ლანძღავს ქართულ საზოგადოებას... ვინ დაარქვა „ქართული ოცნების“ პოლიტიკოსებს ჯოჯოები და მაჯლაჯუნებიო? სააკაშვილი გაურბის პასუხისმგებლობას. სააკაშვილს ასე გამოუვიდა: მე აღარ გაგლანძღავთ, ოღონდ თქვენ ნუ დამიჭერთ.

– ანუ სააკაშვილი უკვე დათმობებზე მიდის?

– პრაქტიკულად ის არანაირ დათმობაზე არ მიდის. ის მაინც შეტევაზეა. სააკაშვილი მაქსიმალურად იყენებს ყველაფერს, მათ შორის დასავლეთის მხრიდანაც მხარდაჭერას. სამწუხაროდ, იმიტომ, არჩევნების შემდეგ „ქართულმა ოცნებამ“ შეწყვიტა ლობისტურ კომპანიებთან ხელშეკრულება, რაც ჩემი აზრით, სერიოზული შეცდომა იყო. საბედნიეროდ, დღეისათვის ეს შეცდომა გამოსწორებულია! დღეს საზღვარგარეთიდან გვესმის, რომ თურმე დემოკრატ სააკაშვილს ებრძვის რეტროგრადი ივანიშვილის ხლისუფლება, რომელსაც პრორუსული ორიენტაცია აქვს და დემოკრატი სააკაშვილის რეჟიმი არის პოლიტიკური დევნის ქვეშ. აშკარაა, რომ დასავლეთსაც არ უნდა აღიაროს, რომ 8-9 წლის განმავლობაში სააკაშვილის კრიმინალურ მთვარობას უჭერდა მხარს.

– გასაგებია დასავლეთის ეს პოზიცია. იგივე დასავლეთში საუბრობდნენ და სახელმწიფო დეპარტამენტშიც გამოითქვა უარყოფითი პოზიცია ბაჩო ახალაიას თავდაცვის მინისტრად დანიშვნის დროს. საუბარი იყო კეზერაშვილის იარაღით უკანონო ვაჭრობაზეც. ესენი ხომ დასავლეთისთვის ცნობილია. მაინც პოლიტიკური დევნაა ნაციონალების?

– ხშირად ჩვენი დასავლეთელი მეგობრები თავის თავთან წინააღმდეგობაში მოდიან. როცა ამერიკაში ვარ, ან აქ ჩამოდიან ამერიკელები, მათ შორის ოფიციალური პირები, და მათთან მაქვს საუბარი როგორც ექსპერტს, ყოველთვის ვაფიქსირებ, რომ ამ ხელისუფლების დანაშაულებრივი ხასიათი მათი აღიარებულიცაა. არის თვალსაჩინო მაგალითი სააკაშვილის რეჟიმის მხრიდან პოლიტიკური დევნისა: ეს არის თემურ ბასილია. ის, როგორც კი სააკაშვილის რეჟიმმა მისი პოლიტიკური დევნა დაიწყო, იმ დღიდან გადავიდა ამერიკის შეერთებულ შტატებში და საქართველოს მთავრობის არაერთი მცდელობისა, ამერიკის მთავრობამ მას ბასილია არ გადმოსცა. უფრო მეტიც, 2011 წელს, როგორც პოლიტიკურად დევნილ პირს, თემურ ბასილიას მიენიჭა პოლიტიკური თავშესაფარი. ამიტომ მე მიკვირს ქართული მთავრობა რატომ არ იყენებს ბასილიას მაგალითს. როცა ამერიკიდან მოდის ბრალდება დემოკრატი სააკაშვილი რეჟიმის დევნის შესახებ, მაშინვე უნდა უთხრან: ბასილიას ხომ მიეცით თქვენ პოლიტიკური თავშესაფარი, ანუ ვის ყავდა პოლიტდევნილი – დღევანდელ მთავრობას თუ სააკაშვილს? ბასილიას თემა ჩემთვის საერთოდ გაუგებარია, რატომ არ იყენებს მის მაგალითს ახალი ხელისუფლება? ინტერპოლი კი დღესაც ეძებს თემურ ბასილიას საერთაშორისო დონეზე, მაშინ, როცა ბასილიას მისამართი ფეისბუქზე დევს და ის ცხოვრობს აშშ-ის დედაქალაქში. საინტერესოა,

რატომ არ ცვლის ბასილიასთან მიმართებაში შინაგან საქმეთა სამინისტრო პოზიციას და რატომ არ ითხოვს ამოდებულ იქნეს ბასილია ინტერპოლის მიერ ძებნილთა სიიდან.

შორენა კოწოწაშვილი